



Vschinauncha da S-chanf
7525 S-chanf



Radunanza cumünela

Bannida / Missiva

**per la radunanza cumünela in marculdi, ils 20 favrer 2019 a las 20.00
sül palc da la sela polivalenta S-chanf**

Stimedas votantas e stimos votants,

La suprastanza cumünela suottametta cotres la bannida e la missiva per la radunanza cumünela dals 20 favrer 2019 ed invida amiaivelmaing da piglier part a quella.

Tractandas:

1. Protocol da la radunanza cumünela dals 28 november 2018*
2. Reglamaint pels commembers da la cumischiun administrativa da l'ouvra electrica cumünela incl. lur indemnizaziun*
3. Cumischiun administrativa OE – tscherna da duos commembers
4. Optimiser senda per viandants e velos da muntagna "Pass Chaschauna" dumanda da credit fr. 510'000.00
5. Ledscha davart il tegner chauns illa vschinauncha da S-chanf (Ledscha da chauns)*
6. Varia

***La documainta per las tractandas sto ad invista/po gnir retratta tar l'administraziun cumünela u es visibla sün l'internet suot:**

www.s-chanf.ch

DEUTSCHER TEXT: BÜCHLEIN BITTE WENDEN

1. Protocol*

Il protocol da la radunanza cumünela dals 28 november 2018 po gnir retrat tar l'administraziun cumünela u es visibel sün l'internet suot: www.s-chanf.ch.

2. Reglamaint pels commembers da la cumischiun administrativa da l'ouvra electrica cumünela incl. lur indemnizaziun*

Situaziun da partenza:

A la votaziun a l'urna dals 04 marz 2018 haun las votantas e'ls votants aderieu al concept da forz'electricca 2020 e l'acceptaziun da la rait d'avent dals 01. october 2020 cun üna quota da vuscher d' 84%.

A la votaziun a l'urna dals 23 settember 2018 haun las votantas e'ls votants aderieu a la revaisa parziela da la constituziun cumünela (art. 59 bis) cun üna quota da vuscher da 92% e s-chaffieu la basa per funder l'OE S-chanf. Impü ho la radunanza cumünela ils 24 october 2018 approvo la ledscha-OE. Per cha'ls commembers da la cumischiun da las OE paun piglier sü immediat las lavuors da la cumischiun, suottametta la suprastanza cumünela a la radunanza cumünela il «Reglamaint pels commembers da la cumischiun administrativa da l'ouvra electrica cumünela incl. lur indemnizaziun».

Proposta:

La suprastanza cumünela propuona d'approver il «Reglamaint pels commembers da la cumischiun administrativa da l'ouvra electrica cumünela incl. lur indemnizaziun» (OE-Reglamaint-Cumischiun).

3. Cumischiun administrativa OE – tscherna da duos commembers

Situaziun da partenza:

La „ledscha davart l'organisaziun e l'administraziun da l'ouvra electrica cumünela» prevezza la tscherna dals commembers da la cumischiun administrativa tres la radunanza cumünela. La suprastanza cumünela propuona la tscherna da seguints duos candidats competents:

Curdin Barblan, 1982, S-chanf

Indschegner da maschinass FH cun scolaziun supplementera in direcziun d'intrapraisas

Giacum Krüger, 1982, Malögia

Indschegner d'electricited FH cun scolaziun supplementera in direcziun d'intrapraisas

Impü vegn ün commember da la suprastanza delegio illa cumischiun administrativa.

Proposta:

La suprastanza cumünela propuona da tscherner a Curdin Barblan e Giacum Krüger illa cumischiun administrativa da l'OE.

4. Optimer senda per viandants e velos da muntagna "Pass Chaschauna" - dumanda da credit fr. 510'000.00


Situaziun da partenza:

La ruta da velos da muntagna 444 dal maraton da velos dal parc naziunel maina da Livigno sur il Pass Chaschauna in l'Engadin'Ota a S-chanf. I's tratta d'üna part stippa e pretensiusa. La senda vain ütiliseda medemamaing eir scu senda per viandants ed es correspudentamaing signaliseda. A basa dal trassè dischfavuraivel da la senda do que tres precitipaziun e d'ova da naiv adüna darcho grands dans d'erosiun i'l terrain stip, chi staun gnir cumados suot grands cuosts da mantegnimaint.

La suprastanza cumünela ho incumbenzo la firma Eco Alpin SA da Schlarigna d' elavurer ün preproget.

Il preproget preschaint cuntegna l'optimaziun da la part dal sector Alp Chaschauna fin Pass Chaschauna. Ad es previs da transferir la senda cun ün trassè uschè, cha a regard la pendenza e la pusiziun da la senda illa cuntredgia po gnir optimeda a media fin lungia vista in ün bun stedi e cun pocha lavur da mantegnimaint.

Ils cuosts pel fabricat nouv da la senda e la renatüralisaziun da la senda existenta vegnan taxos sün fr. 510'000.00. A divers uffizis sun gnidas fattas dumandas da contribuziuns. I po gnir fat quint cun imports fin 20% dals cuosts totels. La realisaziun da quist proget es prevista i'ls prossems 2 fin 3 ans.



I'l plan d'investiziun sun previs totelmaing fr. 660'000.00 pels ans 2019 – 2022 per las imsüraziuns dal «Masterplan Mountainbike».

Proposta:

La suprastanza propuona a la radunanza cumünela da deliberer il credit da fr. 510'000.00.

5. Ledscha davart il tegner chauns illa vschinauncha da S-chanf (Ledscha da chauns)*

Situaziun da partenza:

La cumischiun „revaiss da la constituziun, da las ledschas ed dals uordens da la vschinauncha da S-chanf“ ho elavuro la ledscha davart il tegner chauns illa vschinauncha da S-chanf (Ledscha da chauns). La ledscha fuorma la basa leghela per inchascher l'imposta da chauns e da druver las entredgias per indemniser las lavuors administrativas colliedas cun l'execuziun da quista ledscha scu eir per construir e controller ils implaunts d'infrastructura in connex cul tegner chauns.

Proposta:

La cumischiun propuona d'approver la ledscha davart il tegner chauns illa vschinauncha da S-chanf.

La suprastanza cumünela sustegna quista proposta.

S-chanf, ils 08.02.2019

La suprastanza cumünela

Il president:	G. Largiadèr
L'actuar:	G.L. Vitalini

